



Inatsisartuni ilaasortaq Bendt B. Kristiansen
Inuit Ataqtigiit

Inissianit, A/S Inissiatileqatigiiffik INI-mit aamma Iserit A/S-imit aqunneqartunit anisitsisarnerit pillugit apeqquteqaammut akissut

Brevdato: 23.01.2017

Sags nr. 2017-743

Dok. nr. 16462259

Asasara Bendt B. Kristiansen

Namminersorlutik Oqartussat aamma Kommuneqarfik Sermersuup inissiaataannik attartortittakkanik attartortunik anisitsisarnerit pillugit apeqqutinnut nassiusannut qjanaq. Matuma kinguliani apeqqutitit issuarneqarput, akissutitaannik malitseqartinneqarlutik.

Postboks 909
3900 Nuuk
Tlf/TlfTlf.: (+299) 34 50 00
E-mail: box909@nanoq.gl
www.naalakkersuisut.

1. A/S INI-mi aamma Iserit A/S-mi agguaqatigiissillugu ukiumut qassit anisitaasarpat?

Akissut: A/S Inissiatileqatigiiffik INI aamma Iserit A/S imatut ilisimatitsissuteqarpoq:

Anisitsinerit	2014	2015	2016
A/S Inissiatileqatigiiffik INI	144	227	164
Iserit A/S	22	37	39

a. Anisitaasartut suut tunngavigalugit anisinneqartarpat? (akiligassat/nipiliorneq/sumiginnaaneq/il.il.)

Akissut: A/S Inissiatileqatigiiffik INI ilisimatitsivoq, 2016-imi anisitsinerit 164-iusimasut, anisitsinernillu taakkunanga akiitsunik akilinngitsuugaqartut 152-iusimapput, 12-illu torersaannginnermik il.il. peqquteqarsimallutik.

Iserit A/S-imit ilisimatitsissutigineqarpoq, anisitsinernut pingaartumik akilinngitsuukkanik akiitsoqarneq peqqutaasartoq. Ukiumut anisitsinernit agguaqatigiissillugit ataatsit – marluk allanik peqquteqartarput.

b. Ilaqutariit meerartallit immikkut isiginiarneqartarpat?

Akissut: A/S Inissiatileqatigiiffik INI ilisimatitsivoq, anisitsinernik suliani pineqartuni tamani kommunimi attartortup pineqartup najugaqarfiani INI-p isumaginninnermilu oqartussaasut akornanni attaveqaqatigiittoqartartoq, pingaartumik ilaqutariinnut meerartalinnut inisseeqqiffissamik naleqquttumik qulakkeerinissaq siunertaralugu. Suleqatigiinnermi tassani aamma isumaginninnermi oqartussaasunit meeqqat atugaannik isumaginninnissaq qulakkeerneqartarpoq.

Iserit A/S ilisimatitsivoq, aqutsisutut attartortut ilaqutariinnermi qanorluunniit inissisimagaluarpata assigiimmik pineqarnissaat isumagisarlugu. Aatsaat isumaginnittoqarfimmiit suliamut akuliuttoqartillugu pissutsit allat, taakkunungalu meeqqat ilanngullugit, tunngavigalugit naliliisoqarsinnaavoq.

2. **A/S INI-mi aamma Iserit A/S-mi anisitsineq pitinnagu iliuitsit suut anisitsinnnginnissaq anguniarlugu iliuserineqarsimasarpat?**

Akissut: 1b-mut akissummi oqaatigineqartutut A/S Inissiaatileqatigiiffik INI-mit kommunimi attartortup najugaani isumaginnittoqarfik attaveqarfigisarpaa. Attartortoq anisitaanissamik pinngitsortitsinnaasumik isumaginninnermi ikiorsiiffigineqarsinnaanersoq Isumaginnittoqarfiup naliliinissaa tamatumani siunertarineqarpoq.

Iserit A/S ilisimatitsivoq, iserternermi attartortoq attartornermut isumaqatigiissummi pisinnaatitaaffiit pisussaaffiillu pillugit siunnersorneqartartoq, taakkunungalu ineqarnermut akiliutinik akiliisussaataaneq aammalu PBS aqutugalugu akiliisalernermi iluaqutissat ilaatinneqartarput. Tamatuma saniatigut isumaginninnermi oqartussaasunut nalunaaruteqartoqartarpoq. Assersuutugalugu attartortoq akiliinissamut nukingisaarneqarpat, tamanna pisut ilaanni oqaloqatigiinnermik aallartitsiviusarpoq, tassanilu attartortoq siunnersorneqartarpoq.

3. **A/S INI aamma Iserit A/S paasisassarsiornerminni ineqartut anisitaannginnissaannut iliuserisinnaasanik nutaanik isumassarsisoqarnerpa?**

Akissut: A/S Inissiaatileqatigiiffik INI ilisimatitsivoq, Akiitsut akiitsunillu akilersuisarneq pillugu Nassuiaammut missingersuusiornermut atatillugu, maanna akiitsut pillugit siunnersuisarnermik misiligutaasumik aallartitsisoqartussanngortoq. Suliap 2017-imi qaammatit siulliit pingasut ingerlanerini Kommune Kujallermi aallartinnissaa naatsorsuutigineqarpoq.

Iserit A/S ilisimatitsivoq, Akiitsut akiitsunillu akilersuisarneq pillugu Nassuiaatip sularineqarneranut atatillugu Iserit aamma INI suliniutissanik siunnersuuteqarsimasut.

4. **A/S INI-mi aamma Iserit A/S-mi akiitsoqarneq pequtugalugu anisitaasimasut akiliisinnaassuseqartuusarnersut takussutissaqarpa?**

Akissut: A/S Inissiaatileqatigiiffik INI ilisimatitsivoq, pisut ilaanni tamanna pisarsimasoq. Assersuutugalugu nalunaarutisiamut, Narsami anisitsisarnernut tunngasumut atatillugu oqaatigineqarsinnaavoq, attartortunit anisitaasunit arlalissuit akiliisinnaassuseqartut, taamaattumillu ineqarnermut akiliutinik akiliisinnaagaluartut uppernarsarneqarmat.

Iserit A/S-ip naatsorsuutigaa, isumaginninnermi oqartussaasut uppernarsaammik taamaattumik pigisaqarsimassasut, tassami – attartortoq ikiorserneqarnissamik qinnuteqarpat, imaluunniit namminneerlutik suliamut akuliukkaangamik – naliliisarput, suliallu tamaasa ikiorsiiffigineq ajorlugit. Attartortoq nammineerluni akiliisinnaassuseqartoq / akiliisinnaassuseqarsimasoq naliliinermik tamanna tunngaveqarsimassaaq.

5. **Akiitsoqarneq peqqutigalugu anisitaasimagaanni qanoq ililluni inimik neqeroorfigineqaqqissinnaaneq anguneqassava?**

Akissut: A/S Inissiatileqatigiiffik INI ilisimatitsivoq, attartortunut INI-mut akiitsunik akilinngitsuugaqartunut tunngatillugu pineqartoq akiitsunik akilinngitsuugaqartillugu INI-mit attartugassamut nutaamut neqeroorfigineqarneq ajortoq.

Iserit A/S ilisimatitsivoq, inissianut nutaamut neqerooruteqartoqarsinnaassappat, akiitsut akilinngitsuukkat akilerneqarsimanissaat piumasaqaataasoq. Tassanili suli utaqquisut allattorsimaffiannut allatsissimanissaq akitsuutinillu akiliisimanissaq piumasaqaataasarpog. Immaqa kommunimut saaffiginninnikkut isumaginninnermi inissiamut innersuunneqarnissaq anguneqarsinnaavoq. Taamatulli pisoqassappat isumaginninnermi oqartussaasut aalajangiisussaapput.

6. **Anisitaasartut kommuninut agguassagutsigit sumi amerlanerpaat anisitaasarpat?**

Akissut: A/S Inissiatileqatigiiffik INI ilisimatitsivoq, anisitsinerit imatut amerlassuseqartut:

Kommune Kujalleq	48
Kommuneqarfik Sermersooq	49
Qeqqata Kommunia	21
Qaasuitsup Kommunia	45.

Iserit A/S taamaallaat Sermersuup Kommuneani inissiateqarpoq, taakkunanngalu anisitsinerit apeqqut 1-imi allassimapput.

Inussiarnersumik inuulluaqqusillunga

Martha Lund Olsen